



Zaplijenjeno 160 kilograma duhana

Granična policija uhapsila je pet osoba, od kojih dvojicu švercera i trojicu po potragama sudova i **SIPA**

Pripadnici Granične policije BiH u proteklih nekoliko dana su uhapsili pet osoba, od kojih tri na osnovu potraga i dvije zbog šverca duhana.

Službenici Jedinice granične policije Dobrljin u nedjelju su spriječili šverc 153 kilograma rezanog duhana bez akciznih markica. Otkriven je graničnom kontrolom mercedesa, bh. registarskih oznaka, u mjestu Otočka Polja na području Krupe na Uni. Vozilom je upravljao Aleksandar Jovičić (39), državljanin BiH. Dva dana ranije službenici ove jedinice oduzeli su 6,5 kilograma rezanog duhana od bh. državljanina Anela Mahmutovića (26). Zbog postojanja osnova sumnje da su počinili krivično djelo nedozvoljen promet akciznih proizvoda, protiv Jovičića i Mahmutovića biće dostavljen izvještaj Tužilaštvu BiH.

Granična policija u Zvorniku u nedjelju je uhapsila Bobana Milića (29), državljanina Crne Gore. Graničnim provjerama utvrđeno je da ga potražuje **SIPA** zbog krivotvorenja isprave i ovjeravanja neistinitog sadržaja. Milić je kontrolisan prilikom ulaska u BiH na Međunarodnom graničnom



Oduzeti duhan

prelazu Karakaj i predat službenicima SIPA.

Granični policajci na Aerodromu Sarajevo na letu iz Istanbula uhapsili su Asima Krasnića (23) nakon što je utvrđeno da ga potražuje Općinski sud u Visokom zbog nasilničkog ponašanja. Krasnić je potom predat službenicima Sudske

policije sudova u Kantonu Sarajevo.

Istog dana pri ulasku u BiH na MGP-u Šamac uhapšen je i Alen Aleksić (28), jer ga potražuje Osnovni sud u Tesliću zbog teške krađe. Službenici JGP-a Orašje državljanina BiH i Republike Srbije predali su pripadnicima Sudske policije Doboju.

D. P.